

Беморни зиёрат қилиш одоблари



15:18 / 06.04.2022 4436

Беморни кўргани бориш суннатдир. Бемор мусулмоннинг бошқа мусулмонлар устида ҳаққи бор. У ҳам бўлса, уларнинг беморни зиёрат қилиб, кўнгил сўрашлари, ҳаққига дуо қилиб кетишларидир.

Ислом беморлар ҳолидан хабар олишни муҳим ишга айлантирган. Чунки бу иш бемор учун, шахсий алоқаларни ҳамда жамиятни му-стаҳкамлаш учун ғоят зарурдир. Мусулмонлар ана ўша олий мартабага эришиш учун доимо ҳаракат қилиб келишган.

Набий соллаллоҳу алайҳи васалламнинг мавлолари Савбондан ривоят қилинади:

«Набий соллаллоҳу алайҳи васаллам:

«Ким бир беморни кўргани борса, то қайтгунича жан-натнинг хурфасида бўлур», дедилар.

«Эй Аллоҳнинг Расули, жаннатнинг хурфаси нима?» дейилди.

«Мевасидир», дедилар».

Муслим ва Термизий ривоят қилганлар.